



Gabinete Wever - Croes II



ISLAONLINE

Noticia di Gobierno

2023

Diamars 15 Augustus 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



Evelyn Wever-Croes
PRIME MINISTER

REDUCCION DEN E CIFRANAN DI CRIMINALIDAD, LO SIGUI TIN UN EFECTO POSITIVO RIBA DESAROYO DI ARUBA SU PILAR ECONOMICO, TURISMO

Ta solamente ora bo tin amor pa bo trabou y pa bo pais, bo ta yega na logronan beneficoso asina

Dialuna mainta, por a tuma nota di un conferencia di prensa di Gobierno, na unda Minister di Husticia Rocco Tjon a anuncia un rebaho den e cifranan di criminalidad na Aruba pa aña 2023. Esaki sigur ta un bon noticia pa Aruba en general y pa turismo, cu ta e pilar economico di e pais. Prome Minister Evelyn Wever-Croes a indica cu un di e prioridatnan di su Gabinete ta siguridat di e comunidad en general. E ta hopi importante pa nos hendenan por sinti nan mes sigur, y por biba trankilo riba e pida baranca aki. Pero esaki no ta conta solamente pa e comunidad di Aruba, sino tambe pa tur esnan cu ta bishita nos isla, sea pa vakantie, trabou of cualquier otro motibo.

Turismo, cu ta conta pa e gran parti di Aruba su GDP ta creciendo. Segun Banco Central, danki na e sector aki, ta premira un crecimiento economico mas grandi di loke a wordo anticipa. Pa cu esaki, e noticia di e reduccion den e cifranan di criminalidad ta hopi importante, mirando cu un subida lo por afecta e crecimiento aki negativamente. Esaki sigur no lo beneficia economia di pais Aruba, mirando cu ta hopi ta e negoshinan, hotelnan y companianan cu ta depende directo of indirectamente di e sector aki.

E rebaho e cifranan di criminalidad, no ta bin su so, sino danki na e bon trabou di esnan cu ta labora den e sector di husticia. Primeramente, Prome Minister ta gradici Minister Rocco Tjon, pa su vision y dedicacion na husticia di pais Aruba. Tambe ta gradici cuerpo policial, pa tur nan esfuerzo y determinacion pa logra yega na e reduccion aki. "Boso trabou no ta uno facil, y ta trece hopi riesgo cune, pero e amor y pasion cu cada un di boso a desplega durante aña, pa logra baha e cifra aki y alabes resolve hopi caso, ta di admira y aprecia. Ta solamente ora bo tin amor pa bo trabou y pa bo pais, bo ta yega na logronan beneficoso asina" Prome Minister a expresa.



Feliz
Dia di Independencia di
India
15.08.2023

2023

Feliz
Dia di Independencia di
India
15.08.2023



Gobierno di Aruba



Gabinete Wever Croes ||





Xiomara Maduro
MINISTER

FUNDACION MUSEONAN ARUBANO TA PRESENTA NAN PLAN PA HABRI BEK PA PUBLICO NA MINISTER DI CULTURA



Recientemente Minister Maduro di Cultura a reuni cu sr. Renwick Heronimo di Fundacion Museonan Arubano (FMA) pa asina repasa e plan pa e cuater museonan cu ta cay bou encargo di FMA por habri bek pa comunidad y bishitante. Ta trata di Museo Historico na Fort Zoutman na Playa, Museo Industrial, Community Museum y Euforia Carnival Exhibition na San Nicolas, cu ta habri nan portanan bek pa ricibi bishita di nos localnan y tambe bishitante cu kier sa mas di Aruba su historia.

Debi na e pandemia e museonan bou encargo di FMA a cera nan porta pa publico door cu FMA no por a sigui conta cu e fondonan cu turismo tabata genera y cu via ATA y APA tabata yega na e museonan. Tabata un situacion hopi dificil pa cual no tabata tin un solucion inmediato. Ministerio di Cultura di su parti a percura pa e coleccionnan por a wordo bon cuida pa asina e museonan por a keda bon conserva te ora FMA por a yega na e fondonan necesario pa bay bek den operacion. Awor den cooperacion cu e partnersnan di semper, ATA y APA, FMA ta logra pa cuminsa bek cu e operacion di e cuater museonan.


Durante e reunion Sr. Heronimo a duna un bista di e plannan pa e museonan pa e resto di aña 2023, y tambe pa locual lo



bira e actividadnan pa añanan 2024 y 2025 pa e museonan. Ta cuminsa operacion di e museonan buscando personal y tambe voluntario pa yuda atende cu publico. Tambe lo traha riba e coleccionnan cu ainda mester wordo exhibi pa nan tambe por yega na conocimiento di nos localnan y bishitante.

Pa e ultimo aki tambe ta masha importante pa FMA por conta cu e colaboracion di mas partners den comunidad cu kier cumpli cu nan deber civico aportando na bienestar di conservacion di e cultura di Aruba.

Minister Maduro ta gradici y desea sr. Heronimo y tambe e hunta di directiva nobo di FMA hopi exito cu e ehecucion di e plannan pa e cuater museonan por habri nan portanan bek pa comunidad y bishitante.



Departamento di Impuesto:

COMERCIANTENAN TA CORDIALMENTE

INVITA PA ASISITI NA UN SESION

INFORMATIVO TOCANTE BBO NA FRONTERA

DIA 17 Y 18 DI AUGUSTUS

Haci reservacion pa sigura bo luga

Ta importante pa comunidad en general, specialmente e comerciantenan, ta na altura di e cambionan di ley y e procesonan nobo cu esakinan ta trece cune.

Por scoge un di e fechanan menciona y haci reservacion via nos formulario digital:

<https://forms.gle/6iH38iE5F2AEKbq96>

Debi cu cupo ta limita, lo acepta maximo 2 persona pa cada reservacion.

E invitacion ta valido pa tur comerciante. Na final di e sesion lo tin oportunidad di haci pregunta relaciona cu e cobranza di BBO na frontera.

**Sesion informativo
di BBO na frontera**

dianan 17 y 18 di augustus 2023

REGISTRA



Departamento di Impuesto



STUDIANTENAN DI EPI HORECA A HAYA UN RECORIDO DI E MEGA CRUCERO CARNIVAL CELEBRATION



Diamars mainta Minister di Turismo y Salud Publico sr. Dangui Oduber conhuntamente cu colega Minister di Enseñansa sr. Endy Croes y 60 alumno di EPI Horeca a wordo invita pa bay riba e mega crucero di Carnival Celebration pa un presentacion sigui pa un recorrido.

Den e presentacion aki Carnival Cruise Lines por a mostra na tur e studiantenan tur e trabounan cu e crucero ta ofrecenan ora cu nan termina nan estudio. Tambe por a haya un bista amplio di tur e servicicionan cu Carnival ta ofrece na su clientenan. Nan a haya un bista di con e bida ta pa biba riba un barco crucero. Pues un splicacion amplio cu a wordo duna na nos hobennan. Minister Oduber ta hopi agradecido di oportunidad cu Carnival a duna na e 60 studiantenan di EPI. Nan a haya un oportunidad unico pa conoce e mega crucero Carnival Celebration, un barco crucero basta nobo cu a drenta servicio na aña 2022. Segun Minister Oduber e la keda masha impresiona di e luho y servicio cu e barco crucero aki ta ofrece. Locual mas a resalta segun e mandatario ta e interes cu a keda demostra pa e studiantenan.

Finalmente Minister Oduber a manda un danki na APA y Carnival Cruise Lines pa brinda un oportunidad unico na nos studiantenan. Esaki sigur lo sirbi como inspiracion y mustranan riba otro oportunidadnan di trabou cu tin na momento cu nan termina nan estudio.



Minister Dangui Oduber: **MUSEONAN DI FMA TA HABRI NAN PORTA UN BIAHA MAS**

Dialuna anochi Minister di Turismo y Salud Publico sr. Dangui Oduber atende un evento hopi importante pa Aruba su turismo como tambe su cultura y herencia. Despues di 3 aña e 4 museonan cu ta bou encargo di Fundacion Museo Arubano (FMA) ta habri nan portanan bek pa nos turistanan y localnan. Esaki a keda anuncia den un evento cu a tuma lugar na Fort Zoutman pa Minister di Finanzas y Cultura sra. Xiomara Maduro. E tabata un anochi ameno caminda Minister Oduber a hiba algun palabra splicando e importancia cu e museonan tin pa Aruba su turismo. Segun e mandatario tin hopi demanda di turistanan cu kier experiencia y sa mas di Aruba su cultura y su herencia.

E museonan di FMA a cera nan porta durante e pandemia. Despues di e pandemia no tabata facil pa e museonan habri nan portanan bek. Minister Maduro a acerca Minister Oduber pa wak ki posibilidad tin pa por habri e museonan bek. Despues di hopi empeño di Minister Maduro y danki na Aruba su turismo cu ta creciendo, Minister Oduber por a percura por medio di e fondonan di Aruba Tourism Authority (ATA) y Aruba Ports Authority (APA) pa hunto habri e museonan bek.

E 4 museonan cu a habri nan portanan bek ta:

- Museo Historico na Fort Zoutman
- Museo industrial na Water Toren San Nicolas
- Museo di comunidad na San Nicolas
- Museo di Carnival Euphoria na San Nicolas.

Cu e habrimento di e 3 museonan na San Nicolas, esaki sigur lo percura pa tin mas trafico di turistanan pa e comercio di pariba di brug.

Minister Oduber ta contento cu e museonan por ta activo bek. E mandatario ta consciente di e importancia cu nos historia, nos cultura tin pa nos como Arubiano. Di otro banda mas y mas nos bishitantenan kier conoce nos historia y con Aruba a desaroya su mes den e ultimo decanan. Pa e motibo aki tabata importante pa logra haya e fondonan pa haci e reapertura di e museonan posibel.

Minister Oduber a sigura cu su Ministerio semper a compromete su mes cu Aruba su historia y Cultura. A sa di yuda cu fondonan por medio di APA, ATA y tambe TPEF cu ta yudando den e restauracion di nos Museo Arqueologico cu tin varios proyecto cu ta andando. E ta importante pa nos museonan ta habri pa turistanan por bishitanan y haya sa mas di nos herencia y nos cultura.

Finalmente Minister Dangui Oduber ta gradici colega Minister Maduro, FMA, ATA y APA pa logra haci esaki posibel.





A RICIBI SELECCION DI BASEBALL U14 CU A LOGRA TITULA CAMPEON DI DIAMOND BRACKET NA BABE RUTH WORLD SERIES 2023 NA VIRGINIA, MERCA



Ayera tardi, seleccion di baseball U14 a regresa Aruba despues di a participa den e Babe Ruth World Series 2023 cu a tuma luga di 3 pa 12 di augustus na Virginia, Merca. Ekipo di Aruba ta gana ekipo di Arlington WA cu e score di 5 – 4 pa asina logra e titulo di campeon den e Diamond Bracket na Babe Ruth World Series.

E hoben Nishentel Meyers a logra e titulo di e miho bateado, cual sigur ta un logro unico. Por a sinti e emocionnan di alegria y orguyo di parti e mayor- y amistadnan den VIP Room di aeropuerto pa ricibi e campeonan di Diamond Bracket na Babe Ruth World Series.

Minister di Deporte Endy Croes tambe tabata presente pa ricibi e delegacion di baseball U14. “Gobierno di Aruba ta sostene deporte y ta hopi orguyoso di tur atleta cu ta briya den exterior y carga e nomber di Aruba”, Minister Endy Croes a enfatisa. Minister Endy Croes ta felicita e atletanan cu e logro aki. Na aeropuerto manager di e seleccion Sr. Giordano Ruiz y pitcher di e ekipo Mylan Petrochi a hiba palabra. Cu deseo, disciplina, determinacion y dedicacion ta logra. Alabes mandatario di Deporte ta gradici mayor- y coachnan cu ta sostene e hobennan den nan deporte favorito. Masha pabien, Aruba ta orguyoso di boso!

MINISTER ENDY CROES A PRESENCIA WEGA AMISTOSO ENTRE S.V. BRITANNIA DAMAS Y JOHNSON UNIVERSITY

**En conexion cu celebracion di 65 aña di existencia di S.V. Britannia
na luna di october proximo**

Den cuadro di celebracion di 65 aña di existencia S.V. Britannia ta organisa dia 12 di tur luna un actividad deportivo. Diasabra ultimo, Minister Endy Croes a presencia un tremendo wega amistoso di futbol U22 entre ekipo di S.V. Britannia Damas y Johnson University. E wega tabata di un nivel halto y na final Johnson University a gana cu score di 2-0. Durante e anochi, Minister Endy Croes a haci entrega di un plakkaat na Sr. Todd Halliburton di Johnson University kende ta coach di e team di Merca.

Sr. Halliburton ta coach di e ekipo femenino di Johnson University di Tennessee, Merca. E ekipo di Johnson University ta na Aruba pa un siman di recreacion y training. Durante nan estadia na Aruba e ekipo di Johnson University a ofrece un "soccer camp" di tres (3) dia completamente gratis pa mucha homber y mucha muhe di 8 pa 12 aña. Minister Endy Croes ta felicita directiva di S.V. Britannia cu e bunita iniciativa. S.V. Britannia ta trahando na un manera hopi positivo pa fomenta wega di futbol na Aruba.



Uni forsa y cu
positivismo
ta produci
beneficianan grandi
den diferente area pa
famianan, politica,
matrimonio, pais, etc
Hunto nos ta uza e
benificianan aki pa
engrandece nos mes
y Aruba.



2023

AÑA DI UNION Y POSITIVISMO! —————